



**USAID**  
HUSI POVU AMERIKANU



## **INSTITUISAUN POLISIA BARAK IHA TIMOR-LESTE Saida maka halo sira diferente?**

**Mahein Nia Lian Nú. 103, 30 Setembru 2015**



**Relatoriu Fundasaun Mahein Nia Lian ne'e suporta husi povu Amerikanu liu husi  
Ajénsia Estados Unidos ba Dezenvolvimentu Internasional (USAID)**

**Vizaun husi autor sira ne'ebé expresa iha publikasaun relatoriu sira ne'e la  
reprezenta vizaun husi Ajénsia Estados Unidos ba Dezenvolvimentu Internasional  
(USAID)**

**Fundasaun Mahein (FM)**

**Website: [www.fundasaunmahein.org](http://www.fundasaunmahein.org)**

**2015**



## Kontiudu sira

Kontiudu sira	2
Introdusaun	3
Metodoljia	3
Polisia: Difinisaun no kuadru legal iha Timor-Leste	4
Diferensia entre instituisaun polisial sira	5
1. PNTL	5
2. KAK	6
3. PSIK	6
Oinsa diferente ho Polisia Militar (PM)?	8
Konkluzaan no rekomendasaun	9
Bibliografia	11



## Introdusaun

Temi kona-bá “polisia” iha Timor-Leste ema hanoin ba los Polisia Nasional Timor-Leste (PNTL). Portantu PNTL maka loron-loron la’o iha comunidade nia leet no hare bebeik husi populasau sira. Polisia ida seluk kuiñesidu mos iha sidade Dili maka Polisia Militar (PM) FALINTIL-Força Defesa de Timor-Leste (F-FDTL).<sup>1</sup> Portantu PM mos sempre la’o bebeik iha comunidade nia leet no atua problema ruma wainhira hetan kontaktu husi populasau sira. Nune’e, populasau sira prefere liu kontaktu ba PM ho intervensaun ka atuaun ne’ebé rapidu ba problema ruma kompara ho polisia seluk ka PNTL, liu-liu populasau balu iha sidade Dili.

Nune’e iha interpretasaun oin-oin kona-bá polisia. Ho hanoin ida katak polisia konseitu ida luan la refere deit ba PNTL no instituisaun seluk mos ne’ebé hala’o kna’ar polisial ho nia natureza rasik. Hanesan introdus tiha ona iha leten PNTL populasau sira kuiñesidu tebes ho fardadu ho kilat inklui ekipamentu seluk ne’ebé harii iha tinan 2000.<sup>2</sup>

Sai duvida liu-tan, tinan hirak liu ba investigador sira Komisaun Anti Korupsaun (KAK) nian treinu kilat husi PNTL. Nune’e mos Polisia Sientifika Investigasaun Kriminal (PSIK) mos mai ho nia natureza hanesan korpu superior polisia kriminal ida. Tuir lei ne’e rasik hatete elementu PSIK bele lori kilat tuir termu sira uzu nian.<sup>3</sup> Serake KAK no PSIK hanesan mos polisia? Ho hanoin ida katak Timor-Leste Nasaun kiik maibe instituisaun polisia barak.

Ho interpretasaun oin-oin kona-bá “polisia”, relatoriu ida ne’e sei deskreve no klarefika diferensia sira entre instituisaun polisial sira tuir idak-idak nia natureza, misaun no kompetensia sira ho Polisia Militar (PM) iha kuadru legal nasional Timor-Leste nian.

## Metodolojia

Referensia prinsipal sira ne’ebé konsidera iha peskiza ida ne’e liu husi revizaun ba literatura ka relatoriu dahuluk sira hanesan Lei Organika PNTL nian, Lei Organika KAK nian, Lei Organika PSIK nian, F-FDTL no Polisia Militar nian, Kodigu Prosesu Penal no Konstituisaun Repúblika Demokratika Timor-Leste (RDTL). Inklui referensia seluk hanesan relatoriu Fundasaun Mahein (FM) nian rasik no relatoriu sira seluk. Konklui iha relatoriu ne’e liu husi diskusaun ne’ebé FM adopta ho naran *Security Sector Discussion* (SSD) ne’ebé involve peskizador sira husi FM rasik.

---

<sup>1</sup> Polisia Militar (PM) konstitui Unidade ida iha FALINTIL-Força Defesa Timor-Leste (F-FDTL) ho dependénsia direta ba Chefe Estado Maior General das Forças Armadas (CEMGFA), ho destinu atu asegura orden no disciplina interna F-FDTL nian, nune’e mós atu garante seguranca infraestrutura, materiál no pesoál militar nian. Tuir Dekretu-Lei no. 26/2009 loron 9 Setembru, Estatutu Orgániku Polisia Militar nian. Artigu 3, número 1.

<sup>2</sup> Dekretu Lei N° 9/2009, loron 18 fulan FEVEREIRU, Lei Organika PNTL.

<sup>3</sup> Dekretu Lei N° 15/2014, loron 14 fulan MAIU, Polisia Sientifika Investigasaun Kriminal (PSIK).



## **Polisia: difinisaun no kuadru legal iha Timor-Leste**

Tuir Dalton di Franco (2008), polisia hanesan meu konjuntu hotu-hotu no funsaun ne'ebé ligadu ho manutensaun orden, sosiedade ida ne'ebé harii husi Estadu. Polisia signifika siguransa sosiedade, tuir lei nia haruka iha kontestu jerais ne'ebé ezekuta husi Governu hanesan lei ne'ebé aas liu no ezekuta liu husi nia auxilar sira tantu diretu no inderetu. Nune'e mos Dalton di Franco sita Aurélio Buarque de Holanda (2008) nia ideia, klasifika polisia hanesan "konjuntu husi lei ka regra ne'ebé imposta ba sidadaun hotu-hotu, orden no suguransa públika". Polisia hanesan manifestasaun poder públiku no autoridade abstrata Estadu nian. Nia hanesan aparelu protetor liberdade no ajente lei nian.<sup>4</sup>

Konstituisaun RDTL artigu 147 kona-bá Polisia no forsa ba siguransa, deskreve polisia nia kna'ar nu'udar:

- 1) Polísia defende legalidade demokrátika no garante sidadaun sira nia seguransa interna, no labele iha partidu polítiku.
- 2) Prevensaun ba krime tenke halo ho respeitu ba direitus umanus.
- 3) Lei fiksa polísia no forsa sira seluk nia rejime.

Maske nune'e, Konstituisaun RDTL artigu 147 hatete deit polisia no forsa seguransa, la refere deit ba instituisaun ida.

Nune'e Kodigu Prosesu Penal Timor-Leste nian 2006, Kapitulo V kona-bá Polisia, artigu 52 polisia nia poder jeral. La temi klaru instituisaun ida maibe ko'alia deit polisia nia medida no prosesu sira penal nian no iha obrigasaun sira atu tuir pedidu no ajuda Ministériu Públiku iha inkeritu ruma.<sup>5</sup>

Signifika iha kuadru legal harii iha Timor-Leste, polisia la'os deit PNTL maibe orgaun ka instituisaun seluk ne'ebé hala'o kna'ar polisial tuir Ministériu Públiku nia lala'ok.<sup>6</sup> Iha ambitu ida ne'e, insituisaun polisial sira ne'ebé temi iha leten no hatur iha lei sira seluk ho nia natureza hanesan polisia maka hanesan PNTL, KAK no PSIK. Nune'e:

Dekretu Lei N<sup>o</sup> 9/2009, loron 18 fulan Feveireiru, Lei Organika PNTL nia natureza hatete PNTL hanesan forsa seguransa ida ne'ebé iha misaun atu defende legalidade demokrátiku, garante seguransa sidadaun no bens nian no proteje direitu sidadaun nian tuir termu ne'ebé estabelese iha Konstituisaun no iha Lei sira.<sup>7</sup>

---

<sup>4</sup> Franco, Dalton di (2008). Agente da Lei. Porto Velho, Rondonia. (Tradusaun la offial husi Fundasaun Mahein (FM).

<sup>5</sup> Kodigu Prosesu Penal Timor-Leste nian tinan 2006, artigu 52, número 1 no 2.

<sup>6</sup> Vital, Nelino (2014). Director Direccão Nacional da Assesoria Juridica e Legislação (DNAJL). Entrevista pesoal

<sup>7</sup> Dekretu Lei N<sup>o</sup> 9/2009, loron 18 fulan Feveireiru, Lei Organika PNTL, artigu 1.



Instituisaun públiku seluk ho nia natureza polisial maka Komisaun Anti Korupsaun (KAK). Tuir Lei N<sup>o</sup>. 8/2009, 15 fulan Jullu, nia natureza hatete Komisaun nu'udar orgaun polisia kriminal espesializada, ne'ebé independente halo intervensaun tenke tuir deit kritériu legalidade no objetividade ne'ebé lei haruka.<sup>8</sup>

Nune'e mos Polisia Sientifika Investigasaun Kriminal (PSIK). Tuir Dekretu Lei N<sup>o</sup> 15/2014, loron 14 fulan Maiu, hatete PSIK hanesan korpu superiór polisia kriminal, ne'ebé organiza tuir ierarkia iha Ministru Justisa nia mahon ho autonomia administrativa, finanseira no patrimoniál.<sup>9</sup>

### **Diferensia entre intituisaun polisial sira**

Sesaun iha leten esplika katak tuir kadru legal iha Timor-Leste intituisaun barak forma nu'udar intituisaun "Polisia". Se ne'e loos, saida maka halo sira diferente? Perguntas ida ne'e lori ita atu komprende diferensia husi intituisaun sira ne'e nian maske hotu-hotu ho nia natureza hanesan "polisia" entre PNTL, KAK no PSIK.

#### **1. Polisia Nasional Timor-Leste (PNTL)**

PNTL hanesan forsa seguransa ida ne'ebé iha misaun atu defende legalidade demokrátiku, garante seguransa sidadaun no bens nian no proteje direitu sidadaun nian tuir termu ne'ebé estabese iha Konstituisaun no iha Lei sira.<sup>10</sup> Husi lei ne'e rasik harii mos unidade no serbisu sira iha PNTL nia laran hanesan Unidade Espesial Polisia (UEP), Unidade Patrullamentu Fronteira (UPF) no Unidade Polisia Maritima (UPM). Kria mos konfuzsaun iha públiku katak unidade oin-oin iha Komandu PNTL nia laran ho tipu kilat oin-oin mos hanesan militar.

Nune'e tuir estratéjia no filozofia polisiamentu nian PNTL iha karakterístika polisia komunitária, maski nia organizasaun, dixiplina, instrusaun no estatutu pesoál nian sei tuir natureza militar, PNTL sei la konstitui forsa natureza militar ida. PNTL iha nia personalidade legal rasik no subordinadu diretu ba Ministériu Defeza no Seguransa<sup>11</sup>, no nia organizasaun ida deit ba territóriu tomak. PNTL organiza tuir ierarkia iha nivel hotu-hotu estrutura nian, no nia membru sira obedese (halo tuir) ierarkia komandu nian.<sup>12</sup>

Nune'e PNTL ho nia kompetensia tuir artigu 2 Dekretu Lei N<sup>o</sup> 9/2009, deskreve kompetensia PNTL nian ne'ebé difine iha lei siguransa nasional no siguransa interna

<sup>8</sup> Lei N<sup>o</sup>. 8/2009, 15 fulan Jullu, artigu 3 número 2.

<sup>9</sup> Dekretu Lei N<sup>o</sup> 15/2014, loron 14 fulan Maiu, artigu 2 número 1.

<sup>10</sup> Dekretu Lei N<sup>o</sup> 9/2009, loron 18 fulan Feveiru, Lei Organika PNTL artigu 1, número 1.

<sup>11</sup> Atual Ministériu Interior.

<sup>12</sup> Dekretu Lei N<sup>o</sup> 9/2009, loron 18 fulan Feveiru, Lei Organika PNTL artigu 1, número 2 to'o 5.



nian<sup>13</sup> no kuadru sira kona-bá objetivu permanente ne'ebé difine ona iha lei siguransa iha ambitu polítika siguransa interna.<sup>14</sup> Hodi promove kondisaun siguransa, manutensaun orden públiku, prevensaun krime, kooperasaun instituisional iha asuntu sira serbisu informasaun nian, fiskaliza fonteira terrestre no maritima, Promove ezekusaun asaun sira administrativu nian ne'ebé simu husi autoridade kompetente sira no kompetensia seluk ne'ebé hatur ona iha lei ne'e rasik.

## **2. Komisaun Anti Korupsaun (KAK)**

Komisaun ne'e pesoa kolektiva ida ne'ebé iha direitu públiku, hakna'ar ho personalidade jurídika, ho independénsia téknika no autonomia administrativa no finanseira. Nune'e, Komisaun simu kbiit nu'udar órgaun polisia kriminal espesializada, ne'ebé independente, halo intervensaun tenke tuir deit kritériu legalidade no objetividade ne'ebé lei haruka. Iha ninia kualidade nu'udar órgaun polisia kriminal nian, Komisaun atua ho direisaun hosi autoridade judisiária kompetente tuir lei haruka.<sup>15</sup>

Komisaun ninia misaun maka halo asaun prevensaun no investigasaun kriminal ba krime korrupsaun nian iha fórma oioin, pekulatu, abuzu poder, tráfico influénsia no partisipasaun ekonómika iha negósiu, hanesan defini ona iha lejislasaun penál nian.<sup>16</sup>

Iha ambitu ida ne'e KAK nia kompetensia tuir Lei N<sup>o</sup>. 8/2009, 15 fulan Jullu, Lei Kona-bá Komisaun Anti-Korupsaun artigu 5 Komisaun nia kompetensia maka prevensaun, investigasaun kriminal iha kazu sira korupsaun nian no prosesu sira penal nian tuir Ministériu Públiku nia lala'ok.

## **3. Polisia Sientifika Investigasaun Kriminal (PSIK)**

Tuir Dekretu Lei N<sup>o</sup> 15/2014, loraon 14 fulan Maiu, Polisia Sientifika Investigasaun Kriminal, artigu 2 deskreve PSIKs hanesan korpu superiór polisia kriminal, ne'ebé organiza tuir ierarkia iha Ministru Justisa nia mahon ho autonomia administrativa, finanseira no patrimoniál.

PSIK nia misaun atu fó tulun ba autoridade judisiál sira, dezenvolve no promove asaun prevensaun, detesaun no investigasaun hirak ne'ebé hola parte iha ninia kompeténsia ka hirak ne'ebé autoridade judisiál kompetente sira fó ba nia, hanesan asegura sentralizasaun nasional ba informasaun kriminal no koordenaun operasionál ne'e rasik no kooperasun polisiál internasionál. PSIK la'o tuir atribuisaun ne'ebé difine tiha iha lei ida ne'e, haktuir Kódigu Prosesu Penál no kumpre loloos ba Konstituisaun no lei

<sup>13</sup> Lei N<sup>o</sup>. 4/2010, Lei Siguransa Interna nian.

<sup>14</sup> Lei N<sup>o</sup>. 2/2010, Lei Siguransa Nasional.

<sup>15</sup> Tuir Lei N<sup>o</sup>. 8/2009, 15 fulan Jullu, Lei Kona-bá Komisaun Anti-Korupsaun. Artigu 3, número 1 to'o 3.

<sup>16</sup> Tuir Lei N<sup>o</sup>. 8/2009, 15 fulan Jullu, Lei Kona-bá Komisaun Anti-Korupsaun. Artigu 4.



sira. PSIK sei atua de'it iha defeza sociedade nian, haktuir loloos legalidade demokrátika nian no kona-ba sidadaun sira-nia direitu.<sup>17</sup>

Nune'e PSIK nia kompetenia tuir artigu 5 kona-bá Prevensaun Kriminal hatete:

1. Kona-ba prevensaun kriminal nian, PSIK mak iha kompe-ténsia, hanesan:
  - a) Halo asaun sira ne'ebé atu limita prátika krime nian, no motiva sidadaun sira atu prevene no hamenus aktu no situasaun hirak ne'ebé fasilita ka posibilita dalan hodi hamosu hahalok krime nian;
  - b) Halo prosedimentu ba detesaun no prevensaun ba si- tuasaun sira ne'ebé bele hamosu prátika krime nian, mak hanesan liuhosi fiskalizaun no vijilánsia ba fatin hirak ne'ebé bele hamosu prátika aktu ilísitu kriminal sira;
  - c) Halo prosedimentu ba análise no tratamentu ba infor- masaun kona-ba krime organizada.
2. Iha ezersísiu ba asaun ne'ebé temi tiha iha número anteriór, PSIK iha asesu ba informasaun ne'ebé presiza ba karakterizaun, identifikaun no lokalizaun ba situasaun, no bele halo identifikaun ba ema no halo vijilánsia, bainhira presiza, ho rekursu iha meu hotu-hotu no téknika rejistu ba son no imajen, hanesan halo revista no bukatuir, haktuir buat ne'ebé hatuur tiha iha lei ida ne'e, iha Kódigu Prosesu Penál no lejislasaun komplementár.

Nune'e mos iha Aritgu 6 konab-bá investigasaun kriminal hanesan deskreve iha alinea sira tuir mai ne'e.

1. Kona-ba investigasaun kriminal, PSIK iha kompeténsia atu halo investigasaun ba krime sira tuir mai ne'e:
  - a) Kontra pás no umanidade;
  - b) Kontra vida, hamosu doloza ka agravadu, bainhira hahalok ne'e halakon ema ruma nia vida;
  - c) Sekuestro, raptu, eskravaun;
  - d) Tráfiku ba ema, ema-nia órgaun no fa'anema;
  - e) Torturakatratamentu kruél, dezagradante ka dezumanu sira seluk;
  - f) Agresaun, esploraun no abuzu seksuál, no la haree ba fraude no ezibisionizmu seksuál;
  - g) Violaun ba korrespondénsia ka telekomunikaun sira;
  - h) Asosiasaun kriminoza
  - i) Partisipasaun iha motín armadu;
  - j) Tráfiku influénsia;
  - k) Kontra seguransa Estadu nian, no laharee ba krime sira kona-ba perturbasaun ba funsionamentu órgaun konstitusionál no la respeita ba símbolu nasional sira;
  - l) Kontra ambiente, no la haree ba krime sira kona-ba peska ilegal, oinsa peska proibida no keimada proibida;
  - m) Hasai dadur, halai sai no halo revolta husi dadur sira;
  - n) Kebra ba marka, selu no editál sira;

---

<sup>17</sup> Dekretu Lei N° 15/2014, loran 14 fulan Maiu, Polisia Sientifika Investigasaun Kriminal (PSIK), artigu 3 número 1 to'o 3.



- o) Taka dalan ka halo destruisaun ba objetu sira ne'ebé iha podér públiku;
  - p) Roubo no inséndiu;
  - q) Burla agravada, burla informátika no burla informátika agravada;
  - r) Subornu, denegasaun justisa, koasaun kona-ba maji- stradu no halo obstrusaun ba atividade jurisdisionál;
  - s) Prevarikasaun no favoresimentu pesoál; □
  - t) Simulasaun ba krime no violasaun ba segredu justisa;
  - u) Empregu abuzivu hosi forsa públika;
  - v) Krimesirabafalsifikasaundokumentu;
  - w) Krime sira ba falsifikasaun osan; □
  - x) Brankeamentu capital no fraude fiskál;
  - y) Explorasaun ba jogu ilísita;
  - z) Krime sira ne'ebé iha relasaun ho tráfiu estupefasiente no substánsia psikotrópika sira no droga ilísita, bainhira partisipa ka informadu tiha;
    - aa) Krime sira seluk ne'ebé de'it mak iha kompleksidade, objetu, ba valór ne'e rasik ka alarme sosiál, Prokuradór-Jerál Repúblika nian sei delega ba nia.
2. Órgaun polísia kriminál sira seluk tenke komunika kedas faktu sira-ne'ebé sira hatene iha relasaun ho preparasaun no ezekusaun ba krime sira ne'ebé temi tiha iha númeru sira anteriór nian ba PSIK no pratika, to'o bainhira nia intervein, kona-ba aktu kautelar hotu-hotu ne'ebé presiza no urjente atu aseguira meiu sira kona-ba prova nian.

### **Oinsa diferente ho Polisia Militar (PM)?**

PM sai kuiñesidu iha sidade Dili wainhira hola papel importante ida iha siguransa interna. Hanesan relatoriu ne'ebé FM hasai ona iha tinan 2011, papel PM nian ida ne'e suporta ka hakat liu PNTL? Ho konkluzaun ida katak intervensaun PM nian dalabarak akontese tanba laiha konfiansa husi públiku ba PNTL ne'ebé la halo intervensaun lalais ba iha kazu sira ne'ebé akontese durante ne'e, no mós kazu violénsia ne'ebé maka akontese, dalabarak envolve membru PNTL nian.<sup>18</sup>

Maske nune'e, PM diferente ho polisia sira seluk tuir Dekretu-Lei N<sup>o</sup>. 26/2009 loron 9 Setembru, Estatutu Orgániku Polísia Militar nian haruka. PM konstitui unidade ida iha F-FDTL ho dependénsia direta ba Chefe Estado Maior General das Forças Armadas (CEMGFA), ho destinu atu aseguira orden no disiplina interna F-FDTL nian, nune'e mós atu garante seguransa infrastrutura, materiál no pesoál militar nian.<sup>19</sup> PM harii, tuir termu artigu 12, no 4 husi Dekretu-Lei N<sup>o</sup>. 15/2006 loron 8 Novembru, nu'udár Unidade integrada ida iha F-FDTL.

Artigu 2 dekretu-lei ne'e rasik hatete kna'ar Polisia Militar nian maka atu evita no kombate ameasa siguransa militar nian, inklui subversaun no ameasa seluk hasoru disiplina militar no integridade F-FDTL nian, no utilizaun ba forsa nian sempre koko

<sup>18</sup> Relatoriu Fundasaun Mahein. Mahein Nia Lian No. 22, 18 Agustu 2011 Polísia Militar: Suporta ka Hakat Liu PNTL?

<sup>19</sup> Dekretu-Lei N<sup>o</sup>. 26/2009 loron 9 Setembru, Estatutu Orgániku Polísia Militar nian. Artigu 3.





atu uza meiu negosiasaun no arbitrajen hodi rezolve disputa ka konfliktu ho dame, inklui preferénsia atu uza kilat ne'ebé la'os hamate (la'os-letál).

Enkuantu iha artigu 6 kona-bá kompeténsia nian, iha pontu 1 esplika katak, PM maka responsável atu garante orden no disiplina interna iha F-FDTL nia laran, mantein regra no regulamentu hotu-hotu iha área jurisdisaun ne'ebé mak tama iha Komandu Territoriál ne'ebé nia horik ba ka ida ne'ebé maka atribui ona, no mós asegura katak parte militar nian sei la halo asaun ne'ebé indisciplinár ka asaun ne'ebé hatun prestijiu instituisaun militar nian.<sup>20</sup>

Ne'e-duni objetivu prinsipál husi estabelesimentu Unidade Polísia Militar nian ne'e maka atu regula regra no norma sira, mantein no fiskaliza orden disiplinar soldadu F-FDTL nian, nune'e ninia kna'ar no devér sira bele hala'o ho di'ak no mós evita ameasa siguransa hasoru militar no proteje integridade F-FDTL nian no harii metin regra hotu-hotu iha organizaun armadu sira nia laran.<sup>21</sup>

### **Konkluzau no rekomendasaun**

Naturalmente instituisaun polisia oin-oin ho interpretasaun oin-oin mos maibe lei maka difine sira nia diferensia tuir natureza, misaun no kompetensia instituisaun nian nu'udar haktuir tiha ona iha Estatutu Organika instituisaun idak-idak nian. Nune'e PNTL hanesan forsa siguransa ida ne'ebé iha misaun atu defende legalidade demokrátiku, garante seguransa sidadaun no bens nian no proteje direitu sidadaun nian tuir termu ne'ebé estabese iha Konstituisaun no iha Lei sira.

Enkuantu KAK nu'udar órgaun polisia kriminal espesializada, ne'ebé independente, halo intervensaun tenke tuir deit kritériu legalidade no objetividade ne'ebé lei haruka. Iha ninia kualidade nu'udar órgaun polisia kriminal nian, Komisaun atua ho direisaun husi autoridade judisiária competente tuir lei haruka. No kompete ba KAK atu halo prevensaun no investigasaun ba kazu korupsaun.

Nune'e PSIK hanesan korpu superiór polisia kriminál, ne'ebé organiza tuir ierarkia iha Ministru Justisa nia mahon ho autonomia administrativa, finanseira no patrimoniál. PSIK nia misaun atu fó tulun ba autoridade judisiál sira, dezenvolve no promove asaun prevensaun, detesaun no investigasaun hirak ne'ebé hola parte iha ninia kompeténsia ka hirak ne'ebé autoridade judisiál competente sira fó ba nia, hanesan asegura sentralizasaun nasional ba informasaun kriminál no koordenasaun operasionál ne'e rasik no kooperasun polisiál internasionál. Partikularmente ba kazu sira kompleksu no organizadu.

---

<sup>20</sup> Dekretu-Lei N<sup>o</sup>. 26/2009 loron 9 Setembru, Estatutu Orgániku Polísia Militar nian.

<sup>21</sup> Relatoriu Fundasaun Mahein. Mahein Nia Lian No. 22, 18 Agustu 2011 Polísia Militar: Suporta ka Hakat Liu PNTL?



Iha sorin seluk, PM konstitui unidade ida iha F-FDTL ho dependénsia direta ba Chefe Estado Maior General das Forças Armadas (CEMGFA), ho destinu atu aseguira orden no disciplina interna F-FDTL nian, nune'e mós atu garante seguransa infraestrutura, materiál no pesoál militár nian. Simplesmente, PM hanesan polisia ba militar sira.

Ho ida ne'e FM rekomenda:

1. Ba Parlamentu Nasional no Governu presiza kria lei ne'ebé difine kona-bá instituisaun investigasaun kriminal sira ka polisial sira ne'ebé idak-idak ho nia natureza polisia entre instituisaun ida ho instituisaun seluk.
2. Rekomenda ba Governu presiza sosializa kna'ar instituisaun polisial sira nian ba comunidade hodi labele kria konfuzaun. Iha ne'ebé instituisaun idak-idak ho nia natureza polisial maibe diferensia iha sira nia kna'ar no kompetensia sira ne'ebé kompete ba instituisaun idak-idak.



## Bibliografia

- Dekretu-Lei N<sup>o</sup>. 26/2009 loron 9 Setembru, Estatutu Orgániku Polísia Militár nian.
- Dekretu Lei N<sup>o</sup> 9/2009, loron 18 fulan Fevereiru, Lei Organika PNTL
- Dekretu Lei N<sup>o</sup> 15/2014, loron 14 fulan Maiu, Polisia Sientifika Investigasaun Kriminal (PSIK)
- Franco, Dalton di (2008). Agente da Lei. Porto Velho, Rondonia
- Kodigu Prosesu Penal Timor-Leste nian tinan 2006
- Konstituisaun Repúblika Demokratika Timor-Leste
- Lei N<sup>o</sup>. 8/2009, 15 fulan Jullu, Lei Kona-bá Komisaun Anti-Korupsaun
- Lei N<sup>o</sup>. 2/2010, Lei Seguransa Nasional.
- Lei N<sup>o</sup>. 4/2010, Lei Siguransa Interna nian.
- Relatoriu Fundasaun Mahein. Mahein Nia Lian No. 22, 18 Agustu 2011 Polísia Militár: Suporta ka Hakat Liu PNTL?
- Vital, Nelino (2014). Director Direcção Nacional da Assesoria Juridica e Legislação (DNAJL). Entrevista pesoal